

Morning Dogri (NSD) National News Bulletin 30-03-2024

आकाशवाणी

- राष्ट्रपति द्रौपदी मुर्मू अज्ज राष्ट्रपति भवन च भारत रत्न सम्मान प्रदान करगंन।
- उपराष्ट्रपति जगदीप धनखड़ होरें आक्खेआ ऐ जे भारत मजबूत न्यायिक प्रणाली आला लोकतांत्रिक मुल्ख ऐ ते कोई बी व्यक्ति जां समूह न्यायिक बवस्था पर दबाह नेई बनाई सकदा।
- भारती नौसेना नै अरब सागर च 12 घैंटें तगर चले दे अभियान च 23 पाकिस्तानी नागरिकें गी सोमाली समुंद्री लुटेरें थमां बचाया ऐ।
- मियामी ओपन टेनिस च भारत दे रोहन बोपन्ना ते उंदे आस्ट्रेलियाई जोड़ीदार मैथ्यू एबडेन अज्ज मर्दे दे डबल्स फाइनल च अमरीका दे आस्टिन क्राजिसेक ते क्रोएशिया दे इवान डोडिंग दी जोड़ी खलाफ खेड्डगंन।
- आईपीएल क्रिकेट च कोलकाता नाईट राईडर्स नै जंदी रातीं बैंगलुरु दे एम. चिन्नास्वामी स्टेडियम च रॉयल चैलेंजर्स बैंगलोर गी 7 विकटें कन्नै हराई दित्ता।

<><><><><><>

Bharat Ratna

राष्ट्रपति द्रौपदी मुर्मू होर अज्ज राष्ट्रपति भवन च भारत रत्न पुरस्कार प्रदान करगंन। साबका प्रधानमंत्री चौधरी चरण सिंह, पी.वी.नरसिन्हा राव, बिहार दे साबका मुख्मन्त्री कर्पूरी ठाकुर ते महान वैज्ञानिक एम.एस.स्वामीनाथन होरें गी मरणोपरांत भारत रत्न दित्ता जाग। साबका उप-प्रधानमंत्री ते बीजेपी दे वरिष्ठ नेता लाल कृष्ण आडवाणी होरें गी बी देशै दे सर्वोच्च सम्मान भारत रत्न कन्नै सम्मानत कीता जाग।

<><><><><><>

Vice President

उपराष्ट्रपति जगदीप धनखड़ होरें आक्खेआ ऐ जे भारत मजबूत न्यायिक प्रणाली आला लोकतांत्रिक मुख ऐ ते कोइ बी व्यक्ति जां कोई समूह न्यायिक बवस्था पर दबाह नेई बनाई सकदा। श्री धनखड़ होरें भारती लोकतंत्र गी अनोखा करार दिंदे होई आक्खेआ जे भारत गी कनून दे शासन दे बारे च कुसै कोला शासन दे बारे च कुसै कोला सबक लैने दी लोड़ नेई ऐ। उपराष्ट्रपति होर कल नमीं दिल्ली च भारती लोक प्रशासन संस्थान दे 70में स्थापना दिवस समारोह गी संबोधत करै करदे हे। उनें आक्खेआ जे कनून दे अग्गे बरोबरी अज्जै दे भारत दी पंछान ऐ। श्री धनखड़ होरें आक्खेआ जे कनून ओकड़े लोकें दी जोआबदेही तैह करै करदा ऐ जेहड़े अपने आपै गी कनून कोला उप्पर मन्नदे न। उनें भारती न्याह बवस्था गी सशक्त, जन हितैशी ते स्वतंत्र करार दित्ता।

<><><><><><>

Somali Pirates

भारती नौसेना नै अरब सागर च 12 घेंटे तगर चले दे अभियान च 23 पाकिस्तानी बसनीकें गी सोमाली समुंद्री लुटेरें थमां बचाया ऐ। भारती नौसैनिक बलें अपनी महारथ ते रणनीतिक तालमेल दा इस्तेमाल करदे होई समुंद्री डकैतें दे कन्नै गल्लबात शुरू कीती ते बिजन खून-खराबे दे उनेंगी आत्म-समर्पण लेई मजबूर करी दित्ता। एह कामयाब अभियान समुंद्री डकैती दी घटनाएं कन्ने निबड़ने ते इलाके च समुंद्री गतिविधिएं दी सुरक्षा जकीनी बनाने च भारती नौसेना दी निर्णायक जित्त दा प्रतीक ऐ। ईरान दे जहाज "अलकंबर 786" दे 28 मार्च गी अगवाह होने दी जानकारी थोने पर समुंद्री च सुरक्षा अभियानें लेई तैनात नौसेना दे दऊं भारती जहाजें-आईएनएस सुमेधा ते आईएनसी त्रिशूल गी इसी छुड़ाने आस्तै भेजेआ गेआ हा। घटना दे बेल्ले ईरानी झंडे आला जहाज सोकोट्रा थमां लगभग 90 समुंद्री मील दूर दक्खन-पच्छम च हा।

<><><><><><>

Pak-China

चीन दिएं कंपनीं पाकिस्तान च आतंकवादी खतरे गी दिक्खदे होई दासू ते डायमर-भाशा-बन परियोजना पर निर्माण कम्म रोकी दित्ता ऐ। तोआई 26 मार्च गी खैबर पख्तेनख्वा च चीनी नागरिकें पर आत्मघाती हमले दी जांच लेई चीन थमां इक दल कल इस्लामाबाद पुज्जा। पाकिस्तान दे गृहमंत्री होरें चीन दे इस जांच दल गी हमले कन्नै जुड़ी दी जानकारी दित्ती। इस हमले च चीन दे 5 नागरिकें ते इक पाकिस्तानी डरैवर दी मौत होई गेई ही।

<><><><><><>

PM-Bill

प्रधानमंत्री नरेन्द्र मोदी होरें गलाया ऐ जे यांत्रिक बुद्धि मता दी सुविधा उपलब्ध कराने लेई ओहदा उचित प्रशिक्षण देना जरूरी ऐ नेई ते ओहदे गलत तरीके कन्नै इस्तेमाल दी शँका बनी रौहग। कल माइक्रोसाफ्ट दे संस्थापक बिल गेट्स हुंदे कन्नै चर्चा च उनें गलाया जे भारत जनेह लोकतांत्रिक देश च कोई बी डीप-फेक दा इस्तेमाल करी सकदा ऐ। उनें गलाया जे एहदे इस्तेमाल दे सरबंध च साफ दिशा-निर्देश होने लोड़चदे न ते प्रमाणिक ते डीपफेक कन्नै तैआर समग्री दे बश्कार फर्क साफ होना लोड़चदा ऐ। बिल गेट्स होरें भारत दी तकनीकी प्रगति ते यांत्रिक बुद्धिमता दे क्षेत्र च भारत दी महत्वपूर्ण भूमका दी सराहना कीती। चर्चा दरान मोदी होरें गलाया जे उनें जीवन-यापन गी सौक्खा बनाने लेई तकनीक दे इस्तेमाल उप्पर जोर दित्ता ऐ। उनें गलाया जे डाटा-सुरक्षा हुन बी इक प्राथमिक विशे बने दा ऐ। प्रधानमंत्री होरें गलाया जे डिजीटल सुविधाएं गी हर इक ग्रां तगर उपलब्ध करा'रदी ऐ। उनें गलाया जे सरकार स्वास्थ्य, शिक्षा, ते कृषि क्षेत्र दे आधुनिकरण लेई डिजीटल तकनीक दी शक्ति दा इस्तेमाल करा'रदी ऐ। उनें गलाया जे नमीं तकनीक अपनाने दे मामले च महिलां मतियां अगें रेइयां न ते इस्सै लेई सरकार नै नमो-ड्रोन दीदी स्कीम शुरू कीती ऐ।

<><><><><><>

Jaishankar

विदेश मंत्री डॉ. एस.जयशंकर होरें यूक्रेन दे अपने हमरुतबा दमित्री- कुलेबा हुंदे कन्नै रूस-यूक्रेन संघर्ष ते एहदे व्यापक नतीजे उप्पर नमीं दिल्ली च चर्चा कीती।

सोशल मीडिया उप्पर इक पोस्ट च डॉ. जयशंकर होरें गलाया जे दवै नेताएं बशकार आपसी हित दे वैश्विक ते क्षेत्रीय मुद्दें उप्पर बचार बमर्श होआ। उनें गलाया जे भारत यूक्रेन दे कन्नै दपक्खी सैहयोग सनें समग्र सरबंघै गी होर मजबूत बनाने लेई वचनबद्धता ऐ। डॉ. जयशंकर होरें गलाया जे यूक्रेन दे विदेश मंत्री दी भारत यात्रा करी यूक्रेन दी परिस्थिति गी गैहराई कन्नै समझने दा मौका थहोआ ऐ। उनें गलाया जे मीटिंग दरान दवै लीडरें बपार, निवेश, विज्ञान ते तकनीक, रक्षा, कृषि, सेहत, संस्कृति ते शिक्षा सनें होर दुए आपसी हितें आले क्षेत्रें दे बाद्धे विकास बारे बी तफसीली चर्चा कीती। उनें गलाया जे दवै मुल्खै इस बारे अंतर सरकारी समिति दी 7मीं बैठक दे आयोजन लेई बी सैहमति बुज्झी। यूक्रेन दे विदेश मंत्री होर कल दऊं दिनें दे यात्रा उप्पर भारत आए दे न।

<><><><><><>

Congress

कांग्रेस नै दावा कीता ऐ जे आयकर विभाग नै पार्टी गी 1 जहार 823 करोड़ रपे शा मते दा भुगतान करने दा नमां नोटिस भेजेआ ऐ। पार्टी अध्यक्ष मल्लिकार्जुन खड़गे होरें गलाया जे आयकर विभाग पैहले गै कांग्रेस पार्टी दे खाते थमां 135 करोड़ रपे कच्डी चुकी दी ऐ जेहड़ा पार्टी गी चंदे दे तौरा उप्पर मिलेआ हा। सोशल मीडिया उप्पर इक पोस्ट च उनें आरोप लाया जे मुख्क विपक्षी दल गी परेशान करने लेई आयकर विभाग गी इक थेआर दे रूपै च इस्तेमाल कीता जा'रदा ऐ। तोआई बीजेपी नै गलाया ऐ जे आयकर विभाग उप्पर आरोप कांग्रेस दी निराशा गी दर्शादा ऐ। बीजेपी प्रवक्ता सैयद जफर इस्लाम होरें गलाया जे कुसा बी पंजीकृत, राजनीतिक दल लेई आयकर रिटर्न दाखल करना जरूरी ऐ। कांग्रेस दे नां शड़ा रिटर्न भरने च देरी कीती सगुआं अपनी ओदन बी गलत दस्सी।

<><><><><><>

Satendra Jain

गृह मंत्रालय नै जेलै च बंद आम आदमी पार्टी दे नेता ते दिल्ली दे साबका मंत्री सत्येंद्र जैन पर ठग, सुकेश चन्द्रशेखर दे जबरन वसूली दे आरोपें दी जांच लेई सीबीआई गी मंजूरी देई दित्ती ऐ। सूत्रें मूजब एह मामला चन्द्रशेखर दे ओकड़े आरोप कन्नै जुड़े दा ऐ जेहदे च उन्नै आक्खेआ ऐ जे दिल्ली कैबिनेट च मंत्री रौहदे होई सत्येंद्र जैन नै ओहदे शा 10 करोड़ रपे दी मंग कीती ही।

इस बारे च ठक चन्द्रशेखर नै नवंबर 2022 च दिल्ली दे उपराज्यपाल गी चिट्ठी बी लिखी ही।

<><><><><><>

Tennis

मियामी ओपन टेनिस च पैहले नंबर दे खडारी रोहन बोपन्ना ते उंदे आस्ट्रेलियाई जोड़ीदार मैथ्यू एबेडन अज्ज मर्द युगल फाइनल च अमरीका दे आस्टिन क्राजीसेक ते क्रोएशिया दे इवान डोडिग दी जोड़ी दे खलाफ मैच खेड्डगंन। बोपन्ना हुंदे लेई एह 14मां एटीपी मास्टर्स 1 जहार मां फाइनल होग, जिने अजें तगर 25 डबल्स खिताब जित्ते न। भारत-आस्ट्रेलियाई जोड़ी नै वीरवार गी सैमीफाइनल च चौथे नंबरे दी खडारी स्पेन दे मार्सेल ग्रेनोलर्स ते अर्जेटीना दे होरासियो जेबालोस गी हराया हा।

<><><><><><>

IPL

आईपीएल क्रिकेट च कोलकाता नाईट राइडर्स नै जंदी रातीं बेगलुरु दे एम.चिन्नास्वामी स्टेडियम च रॉयल चैलेंजर्स बैंगलोर गी 7 विकेटें कन्नै हराई दित्ता। पैहले बल्लेबाजी करन उत्तरी दी बैंगलोर रॉयल दी टीम नै विराट कोहली दे 59 गेदें च 83 रंजें दी मदाद कन्नै तैह 20 ओवरें च 6 विकेटें पर 182 रंज बनाए। एहदे परते च कोलकाता नै शडे 16 ओवरें ते 5 गेंदें च 3 विकेटां मुआइयै एह लक्ष्य हासल करी लैता। वेंकटेश अय्यर नै 30 गेंदें च 50 रंज बनाए। कोलकाता नै आईपीएल दे इस संस्करण च हुनै तगर खेड्डे गेदे दौनें मैचें च जित्त दर्ज कीती ऐ। उत्थें गै रॉयल चैलेंजर्स बैंगलोर नै अजें तगर खेड्डे गेदे त्रऊं मैचें चा शड़ा इक मैच गै जित्ते दा ऐ। अंक तालिका च कोलकाता दूई जदके राजस्थान रॉयलस त्रीये नंबरै पर ऐ। चेन्नई सुपर किंग्स सब्बने शा उप्पर पैहली थाहरै पर ऐ।

<><><><><><>